



# basic education

Department:  
Basic Education  
**REPUBLIC OF SOUTH AFRICA**

## NATIONAL SENIOR CERTIFICATE

**IGREYIDI 12**

**ISINDEBELE ILIMI LOKUTHOMA LOKUNGEZELELA (FAL)**

**IPHEPHA LESIBILI (P2)**

**NOVEMBA 2013**

**IMITLOMELO: 70**

**SIKHATHI: ama-iri ama-2**

**Iphepheli linamakhasi ali-16.**

**YELELA**

1. Umfundi kufanele afunde ikhaseli ngokukhulu ukuyelela ngaphambi kobana aphenhule imibuzo.
2. Ungalingi ukufunda iphepha lemibuzo loke. Qala ikhasi lokumumethweko elisekhasini elilandelako bese utshwaya iinomboro zemibuzo ebuzweko ngeencwadi ozifundileko kilomnyaka. Ngemuva kwalapho, funda imibuzo le bese ukhetha leyo ofisa ukuyiphendula.

3. Iphepheli LINEENGABA EZINTATHU:

ISIGABA A:	Inovela	(35)
ISIGABA B:	Iindaba ezifitjhani	(35)
ISIGABA C:	Iinkondlo	(35)

4. Landela imiyalo onikelwe yona ekuthomeni kwaleso naleso sigaba ngokuyelela okukhulu.
5. Khetha IINGABA EZIMBILI uphendule ngazo. Nangabe ukhethe ISIGABA C ukatelelekile bona uphendule IMIBUZO EMIBILI kiso.

ISIGABA A munye umbuzo bese ISIGABA C mibili imibuzo.

NOFANA

ISIGABA B munye umbuzo bese ISIGABA C mibili imibuzo.

NOFANA

ISIGABA A munye umbuzo bese ISIGABA B munye umbuzo.

6. Sebenzisa irhelo lokuhlola ukuqinisekisa bona yoke imibuzo uyiphendulile.
7. Tlola iinomboro zeempendulo njengombana zinjalo ephepheni lemibuzo.
8. Thoma isigaba ESINYE NESINYE ekhasini ELITJHA.
9. Isikhathi esiphakanyisiweko sokuphendula isigaba ngasinye:

ISIGABA A:	Pheze imizuzu ema-40
ISIGABA B:	Pheze imizuzu ema-40
ISIGABA C:	Pheze imizuzu ema-40

**IKHASI LETHEYIBULA LOKUMUMETHWEKO:**

Ikhaseli lizokusiza abafundi kobana bakhethe imibuzo ebafisa ukuphendula ngayo ngaphandle kokufunda iphepha loke lemibuzo.

<b>ISIGABA A: INOVELA</b>			
<b>Phendula NOFANA ngiwuphi umbuzo OWODWA.</b>			
<b>INOMBORO YOMBUZO</b>	<b>UMBUZO</b>	<b>IMITLOMELO</b>	<b>INOMBORO YEKHASI</b>
1. <i>UBonakele</i>	Umbuzo omude	35	5
<b>NOFANA</b>			
2. <i>UBonakele</i>	Umbuzo onemibuzo emifitjhani	35	5
<b>ISIGABA B: IINDABA EZIFITJHANI</b>			
<b>Phendula NOFANA NGIWUPHI umbuzo OWODWA.</b>			
3. <i>UZangenzani</i>	Umbuzo omude	35	8
<b>NOFANA</b>			
4. <i>UZangenzani</i>	Umbuzo onemibuzo emifitjhani	35	8
<b>ISIGABA C: IINKONDLO</b>			
<b>Phendula NOFANA ngiyiphi imibuzo EMIBILI.</b>			
5. <i>Licimile Ilanga</i>	Umbuzo onemibuzo emifitjhani	17½	11
<b>NOFANA</b>			
6. <i>Ngitlhuwile</i>	Umbuzo onemibuzo emifitjhani	17½	12
<b>NOFANA</b>			
7. <i>Umona</i>	Umbuzo onemibuzo emifitjhani	17½	14
<b>NOFANA</b>			
8. <i>Iindawula</i>	Umbuzo onemibuzo emifitjhani	17½	15

**IRHELO LOKUQINISEKISA**

Tlola itshwayo (✓) erhelweni lokuqinisekisa elilandelako ukuhlola bona uphendule yoke imibuzo elindelekileko.

<b>ISIGABA</b>	<b>IINOMBORO ZEMIBUZO</b>	<b>INANI LEMIBUZO EZOKUPHENDULWA</b>	<b>ITSHWAYO</b>
<b>ISIGABA A:</b>		<b>1</b>	
UMBUZO 1	1		
UMBUZO 2	2.1–2.2.10		
<b>ISIGABA B:</b>		<b>1</b>	
UMBUZO 3	3		
UMBUZO 4	4.1–4.1.20		
<b>ISIGABA C:</b>		<b>2</b>	
UMBUZO 5	5.1–5.9		
UMBUZO 6	6.1–6.9		
UMBUZO 7	7.1–7.9		
UMBUZO 8	8.1–8.9		

**ISIGABA A: INOVELA**

Phendula umbuzo OWODWA kwaphela kilesisigaba (UMBUZO 1 nofana UMBUZO 2).

**UMBUZO 1: UBONAKELE – M Sikosana**

Hlathulula ngesakhiwo senovela (isingeniso, itjharagano, isitlthori nesiphetho) uveze nokobana siwuthinta njani ummongondaba wenoveli le. Ipendulwakho ingadluli emagameni ali-190 ukuya kwama-240.

**[35]****NOFANA****UMBUZO 2: UBONAKELE – M Sikosana**

2.1 Fundisisa isiqetjhana esilandelako bese uphendula imibuzo.

'Madekhethu! Izambatho zami zoke zisele kiley' ikoloyi ekade ngiyikhwele nangiza lapha. Nendlala seyithoma ukungisahlala. Ngomele namanzi. Umzimbami woke udiniwe, kunjalo nje ngithoma nokwizwa amakhaza. Yindaba engizayithini yoke le? Kodwana lokhu ngikubona kungcono khulu kunepilo le ekade ngiyiphila kwethu. Kuliqiniso akekho umuntu ozangisiza la kodwana okuthokozisako kukobanyana umphefumulo wami uphumulile.'

UBonakele walala khonapho, ngelanga elilandelako wavuka ngamasa avuswa makhaza. Wagelagela loke ihlathi angazi bonyana uya kuphi. Lapha ehlathini kunzima akakwazi ukubona ngitjho nelanga khona azakwazi bonyana sikhathi bani. UBonakele bekagelagela loke ihlathi afunana neentshelo zemangweni. Ebusuku godu alale khona lapho ehlathini. Kwaze kwaphela amalanga amathathu alala lapho ehlathini. 'Ngimi lo osele aphenduke intandani namhlanjesi abazali bami kube basaphila bobabili?' Watjho njalo zehla zalandelana iinyembezi kodwana wazisula ngombana akekho umuntu angamlilela nasele kunjengobana kunje. 'Namhlanjesi ngizwa umzimbami lo ungangivumeli kuhle bona ngiyokulala kilelihlathi ngombana izolo ngibone inyoka phezu komuthi' Athule aqale ngehlathini lapha avame ukulala khona.

'Ipheze yangigongoda inyoka leya. Nje-ke kungcono ngiyokulala kude nehlathi namhlanjesi.'

- |       |   |     |
|-------|---|-----|
| 2.1.1 | Ngibuphi ubudisi uBonakele ahlangebezana nabo nakafika ehlathini? Tlola amaphuzu AMABILI. | (2) |
| 2.1.2 | Walala amalanga amangaki uBonakele ehlathini?   | (1) |
| 2.1.3 | Ngisiphi isilwana esapheze samluma uBonakele ngesikhathi alele ehlathini?                 | (1) |
| 2.1.4 | Hlathulula ngamaphuzu AMABILI ngepilo ebeyiphilwa nguBonakele ekhabo.                     | (2) |
| 2.1.5 | Ngikuphi okwenziwa nguMbuyiseli ukuze ipilo kaBonakele ibe ngcono. Tlola MABILI amaphuzu. | (2) |

- 2.1.6 Yini eyenziwa nguDilika noHloyiwe eyabangela bona uBonakele anghale kwaMbuyiseli? (2)
- 2.1.7 Ingabe isiqu nto sikaBonakele sokulisa ukusebenza eNdiyeni sibe sihle na? Sekela ipendulwakho. (2)
- 2.1.8 Uvezwe amlingisi onjani uMahlangu? Tlola amaphuzu AMATHATHU. (3)

2.2 Fundisisa isiqetjhana esilandelako bese uphendula imibuzo.

Waphuma eDaveyton kodwana zange aye kude khulu neDaveyton. Wathi nasele angaphandle kwayo indawo le, waqalaqala ngapha nangapha, wabona indawo lapha kulahlwa khona iinkoloyi ezindala ezingasebenziko. Wavula ibadi, lavuleka. Wangena ngaphakathi wahlala khona wacabanga. 'Madekhethu! Bengisithi nge ... ngiyifake ngapha imali leya. Ngabe iyephi kodwana? 'Waphumbutha ngesikhwameni kodwana zange ayifumane, 'M ... sengiyabona kwanjesi, imali yami ithethwe besanyanaba engihlangene nabo nangifika lapha eDaveyton.' UBonakele wajama ihloko, yababudisi ingasuthi uyibolekiwe. Kwaba nzima emehlweni, kwahla emini. 'Phana muraro engizawathini lo? Ukudla anginakho. Lapha kimi ngisele namaranda amabili nje kwaphela, phezu kwemalikazi enengi kangaka ebe nginayo. Ngaze ngatlhaga mina ngisesemncancani kangaka. Lapha ngikhonapha khona nje, sekuzaba mumuzi engizakuhlala kiwo ngize ngife! Akusekho lapha ngizabe ngisaya khona. Boke abantu bayangiqala bangiqalisise. Nabangibonako ungasuthi mina angifani nabanye abantu.' UBonakele walala lapho, ngaphakathi kwekoloyi afikele kiyo le. Ekuseni ngelanga elilandelako wavukela ngesitolo ukuyozifunela ukudla. Njengobana abonile bonyana ngesikhwameni sakhe wafumana kusele amaranda amabili kwaphela, wathatha yona imadlana leyo wathenga ama-abhulana amahlanu nomgadango.

- 2.2.1 Wayesele namalini uBonakele nakafika ekoloyini ahlala kiyo? (1)
- 2.2.2 Wathengani uBonakele ngemalakhe eseleko. Tlola izinto EZIMBILI. (2)
- 2.2.3 Hlathulula isehlakalo esehlala uBonakele nakaqeda ukwehluka ibhesi eDaveyton. (2)
- 2.2.4 Ngiliphi iqhinga uBonakele alenzako ukuze akghone ukuphila nakafika eDaveyton. (2)
- 2.2.5 Ngowakwabani uKiller? (1)
- 2.2.6 Khuyini eyabangela bona uBonakele ayokweba amahabhula emarigeni? Tlola amaphuzu AMABILI. (2)
- 2.2.7 UBonakele azange apha theke kuhle nakahlala ekamarweni alifumana kwaMthimunya. Sekela lokhu ngamaphuzu AMABILI. (2)

- 2.2.8 Madanisa umutjho OKUKHOLOMU A nependulo yamambala etholakala KUKHOLOMU B

IKHOLOMU A	IKHOLOMU B
1. Unina likaBonakele	A NguJubi
2. Indodana kaMbuyiseli	B NguNduku
	C NguMary
	D NguDabula
	E NguDilika

(2 x 1) (2)

- 2.2.9 Khuyini eyenza uKiller afune bona uBonakele abe sesiqhemeni sabo somdlalo weendubulo? (2)

- 2.2.10 Phawula ngomlayezo wenovela ethi 'UBonakele'. (4)

**IMITLOMELO YESIGABA A: 35**

**ISIGABA B: IINDABA EZIFITJHANI**

Phendula umbuzo OWODWA kilesisigaba (UMBUZO 3 nofana UMBUZO 4)

**UMBUZO 3: *UZANGENZANI* – DM Jiyane nabanye**

**Ukukhamba kubona.**

Tlola ngesizinda (Isikhathi, ihlalo, indawo) sendatjana 'Ukukhamba kubona' uveze bona siwuthinta njani ummongondaba wendatjana le. Ipendulwakho ingadluli emagameni ali-190 ukuya kwama-240.

**[35]****NOFANA****UMBUZO 4: *UZANGENZANI* – DM Jiyane nabanye**

**Ijima**

Fundisisa isiqetjhana esilandelako bese uphendula imibuzo.

Ilanga labe libalele likhupha unomdakana ngemgodini. Uthi nawuqala kude le ubone anga kujame amanzi endleleni. Iinyoni zabe ziphapha zifuna amanzi wokusela. Kwazwakala neenkomo zibhodla emadlelweni.

Emzini kaMahlangu uMaridili, kuhlezi amadoda angaba matjhumi amabili. Amadoda la ahlezi ngebandla ngombana gade kunomthunzana owenziweko. Amalemba ekade bahlakula ngawo isimi kaMaridili abekwe ngaphambi kwesango lebandla. Hlangana nawo amadoda wejima kukhona indoda engumakhelana kaMaridili enguMlayedwa. Uhlezi uphethe ekulu izolo uyakhokha.

Kusalindwe uMaridili ngombana ubangenise ngebandla, wababeka isandla emehlweni wathi uyabuya. Asikime uMlayedwa athi: 'Madoda akhe nithule nilalele!' Kuthulwe ngebandla baqale ngakuye athi: 'Niyabona bona isikhathi siyakhamba na? UMaridili usininde ngebende emehlweni. Nakhe nabona indoda isimeme ejimeni, siyithande kangaka kodwana yona isenze nje. Sekudlule i-awara loke singakatholi umehliso sikhuphe ukoma.' Kuvele uMaridili aphethe umjeka wetlhodlha. Ahlale phasi msinyazana uMlayedwa abe mumuntu ongekho bekurareke woke umuntu ongebandla.

Kungene uMaridili, abeke phasi umjeka athi: 'Ngiyacolisa madoda ukuthatha isikhathi eside kangaka. Indaba kukobana ngiyaziguda.' Kuzwakale ihleko elingapheliko kanti kukhona nabakhulumako. Asikime uMlayedwa alinge ukufihla akutjele amadoda ngombana uyasola bonyana kukhona ongayiphandlusela athi 'Makhelwana akhe ngithulise amadoda ngombana ngibona abasahloniphi. Madoda uNomzana nakakhulumako kufanele sihloniphe khona sizakuzwa umlayezo asiphathele wona.'

- 4.1 Mangaki amadoda egade abizelwe ijima? (1)
- 4.2 Bekalinde ini amadoda ebekeze ejimeni? (1)
- 4.3 Ngimuphi umsebenzi ogade wenziwa lijimeli? (1)



- 4.4      Bebawabeke kuphi amalemba egade bahlakula ngawo isimu? (1)
- 4.5      Ngubani indoda ebeyibize ijima? (1)
- 4.6      Begade enzani uMlayedwa nabasalindele lokho ebakuthenjiswa nguMaridili? (1)
- 4.7      Dzubhula amagama esiqetjhaneni ahlathulula bona bekutjhiswa khulu. (2)
- 4.8      Yini etjengisa bona uMlayedwa ubethanda utjwala? Tlola amaphuzu AMABILI. (2)
- 4.9      Ngikuphi endatjaneni okufakazela bona uMlayedwa bekeba? Tlola amaphuzu AMABILI. (2)
- 4.10     Hlathulula umehluko phakathi kwamadoda ebekeze ejimeni nomakhelana kaMaridili? (2)
- 4.11     UMkhwebani wazi ngani bona uMlayedwa ukhuluma amala nakasithi udla inyama yemvu kwaphela? (2)
- 4.12     Yini engakajayeleki eyenziwa yifuyo kaMaridili? (2)
- 4.13     Funda umutjho olandelako bese ukhetha ipendulo enembako.
- UMkhwebani wasawula uMlayedwa ngepama ngombana:
- A      Ebe izimvu zabo.
- B      Aphendule kumbi amadoda eze ejimeni.
- C      Aqothe umfazi.
- D      Abulele imbuzi kaMkhwebani. (1)
- 4.14     Tlola iinzathu EZIMBILI ezivezwe nguMlayedwa ezingunobangela wokobana angabi nomfazi. (2)
- 4.15     Bewuyini umnqopho wokumema ijima? Tlola iphuzu ELILODWA. (2)
- 4.16     Bekatjho ukuthini uMaridili nakathi 'uyaziguda'? (2)

- 4.17 Madanisa igama ELIKUKHOLOMU A nependulo yamambala EKUKHOLOMU B.

IKHOLOMU A	IKHOLOMU B
4.17.1 Itlhodlha.	A Yindawo lapha amadoda agade ahlangene khona.
4.17.2 UMkhwebani.	B Butjwala obaselwa madoda kwaMaridili.
4.17.3 Ujiyana	C Yindoda eyeba iimbuzi.
	D Yindoda eyabetha uMlayedwa ngepama.
	E Yindoda eyakhuza uMlayedwa bona aziphathe kuhle.

(3 x 1) (3)

- 4.18 Qedelela umutjho olandelako ngokukhetha ipendulo eyodwa keziseembayaneni.

Ukulwa kukaMlayedwa namanye amadoda kuveze irarano ... (langaphakathi, hlangana nomlingisi nendawo, hlangana nabalingisi.) (1)

- 4.19 Ucabanga bona kuyinto ehle ukubiza ijima? Sekela ipendulwakho ngamaphuzu AMABILI. (2)

- 4.20 Uvezwe amlingisi onjani uMlayedwa? Sekela ipendulwakho ngamaphuzu AMABILI. (4)  
[35]

**IMITLOMELO YESIGABA B: 35**

**ISIGABA C: IINKONDLO**

Kilesisigaba phendula imibuzo EMIBILI kwaphela.

**UMBUZO 5**

Fundisisa ikondlo elandelako bese uphendula imibuzo.

**Licimile Ilanga – A Mnguni**  
**(Ngokulala kweNgwenyama ikosi uMabusabesala II: 1992)**

- 1 Besihlezi kamnandi,
- 2 Sifukanyelwe nguwe,
- 3 Singezwa amakhaza,
- 4 Singezwa lothe.
- 5 Gadesi akusesenjalo,
- 6 Ilanga licimile,
- 7 Licimile ilanga.
- 8 Isitjhaba soke savelelwa,
- 9 Kwahlaluka bona ngeze
- 10 Kwaphilwa.
- 11 linhliziyo zarhohlomela,
- 12 Zigubuzeswe budisi bephasi,
- 13 Amehlo asala amlambokazi.
- 14 Sizakulibala njani
- 15 Ilothe liziphe amandla nje?
- 16 Lizakukhandelwa ngubani
- 17 Isitjhaba sibuthakathaka nje?
- 18 Ngawe savuka ebuthongweni,
- 19 Ngawe indlela yakhanya,
- 20 Yakhanya kanye tere!
- 21 Sakwazi ukuphila, sagadanga
- 22 Siqale phambili umkhanyo ukhona.
- 23 Gadesi uphi?
- 24 Besihlezi kamnandi
- 25 Singazi bona liyokufika ilanga,
- 26 Ilanga ngitjho eliginya nelanga
- 27 Isitjhaba sisale sisodwa.
- 28 Gadesi siyazi ngombana
- 29 Licimile ilanga.

5.1 Ingabe ikosi ingathekiswa nani kilekondlo? (1)

5.2 Buyelela utlole imida engenzasi bese uveze ivumelwano bewutjho nokobana mhlobo bani wevumelwano?

Kwahlaluka bona ngeze  
Kwaphilwa.

(2)

- 5.3 Ngiziphi izinto EZIMBILI ezilahlekele isitjhaba njengoba ilanga licimile nje. (2)
- 5.4 Dzubhula umuda osekondlweni ohlathulula bona:
- A Isitjhaba salila khulu ngeemva kokucima kwelanga  
B Isitjhaba siphelwe mamandla. (2)
- 5.5 Tlola ubukondlo obutholakala emudeni olandelako:
- Licimile ilanga. (2)
- 5.6 Emudeni olandelako kunamalanga amabili. Tlola umahluko phakathi kwamalanga lawa.
- Ilanga ngitjho eliginya nelanga (2)
- 5.7 Ngiliphi ELINYE igama elitjho amakhaza kilekondlo? (1)
- 5.8 Imbongi kilomuda othi: 'sifukanyelwe nguwe' ingabe ifanisa ikosi nani? (2)
- 5.9 Imbongi isivezele muphi ummoya kilekondlo? Sekela ipendulwakho ngamaphuzu AMATHATHU. (3½)  
[17½]

### NOFANA

#### UMBUZO 6

Fundisisa ikondlo elandelako bese uphendula imibuzo.

#### Ngitlhuwile – JN Malobola

- 1 Ngijamile ngithule ngithe du,
- 2 Ngijame nje ngiyaqalaqala;
- 3 Ngiqalaqala ummango,
- 4 Imimango engikhe ngayikhamba.
- 5 Namhlanjesi ngitlhuwile,
- 6 Amahlathi nemimango kuyile,
- 7 Kuye akusabonakali nomfuyi,
- 8 Sesengijame ngibambeke njengomloyi.
- 9 Emmangweni kwakulila imitshere,
- 10 Kwakulila iketeza norhubayi,
- 11 Kwakumimihla yethando elivutha komlilo,
- 12 Libopha abantu ikatha.
- 13 Imirwibili itjhagala emahlathini,
- 14 Ibetha imilozi njengeentjheli
- 15 Zisoma imidzidlha
- 16 Ummango ungaboni ukoma.

- |    |   |
|----|---|
| 17 | Ngitlhuwile, ngihlulukele umnombela,          |
| 18 | Iye, umtshadlho nomvilo                       |
| 19 | Ngihlezi ngaphasi komtholo.                   |
| 20 | Gadesi uphi ummango?                          |
| 21 | Uphi wekhethu umlanjana?                      |
| 22 | Ngisele amakhaza njengerhwaba.                |
| 23 | Ngipholise ihloko eqaqamba njengezulu,        |
| 24 | Iqaqamba inganaduma.                          |
| 25 | Ngithi uphi wekhethu umlambo                  |
| 26 | Ngisuse ukutjhisa nenyora?                    |
| 27 | Ngisele aphole njengesithundu sethwasa,       |
| 28 | Kiwo ophakela imizi nemizana.                 |
| 29 | Ngitlhuwile, ngitlhuwele umraga,              |
| 30 | Lapha bekudla zabokhokho,                     |
| 31 | Inarha isese liphasi,                         |
| 32 | Iphasi lokuphila.                             |
| 33 | Isigume kwakusese mphako                      |
| 34 | Womkhambi akhambela ukubuya.                  |
| 35 | Imbicani nomsobo zisese sitjhebo sokulingana, |
| 36 | Ihloko isakhula nomzimba.                     |
| 37 | Iye, iinthebe zihlwa ziphuphuma,              |
| 38 | Iye, imitlhodlho ihlwa imanzi,                |
| 39 | Iye, unotlabalala arhanyulwa angaselwa.       |
| 40 | Iye, ngitlhuwile, layizolo likude!            |

- 6.1 Tlola izinto EZIMBILI imbongi ezibona zingasekho ukuya ngendima yesibili. (2)
- 6.2 Imbongi beyenzani kade nangabe ihlokwayo ibuhlungu? (1)
- 6.3 Tlola munye umrorho imbongi ebeyitjheba ngawo ekadeni? (1)
- 6.4 Ngibuphi utjwala besikhethu obuvezwe ekondlweni? (1)
- 6.5 Kilemida elandelako kuvele iseqamagama. Tlola igama eleqiweko emudeni ngamunye.
- A Ngisele amakhaza njengerhwaba
- B Lapha bekudla zabokhokho
- C Kiwo ophakela imizi nemizana
- D Iye, ngitlhuwile, layizolo likude. (4)
- 6.6 Tlola isithombengqondo esivezwe emudeni ngamunye.
- A Ngipholise ihloko eqaqamba njengezulu
- B Imirwibili itjhagala emahlathini. (4)

6.7 Imbongi kilekondlo isivezela ...

- A Ipilo yezabelweni.
- B Ipilo yelokitjhini.
- C Ipilo yedorobheni.
- D Ipilo yemaplasini.

(1)

6.8 Uyini ummongondaba wekondlo le? Hlathulula ngamaphuzu AMATHATHU.

(3½)

**[17½]**

## NOFANA

### UMBUZO 7

Fundisisa ikondlo elandelako bese uphendula imibuzo.

#### Umona – MS Ntuli

- |    |   |
|----|---|
| 1  | Nguhliziyokul' umafela-ngendeni,          |
| 2  | Sihlub' abany' iimpiko                    |
| 3  | Angazenzeli yena.                         |
| 4  | Ngumarhudul' amehlw' abomvu;              |
| 5  | Wamalangab' atjhisa kutjhisa,             |
| 6  | Abe makhaza kumakhaza.                    |
| 7  | Ngunyawo liphapha phezulu,                |
| 8  | Nguhloko sithaya phasi.                   |
| 9  | Nguhliziyo silal' emini, sivuk' ebusuku;  |
| 10 | Sirhulurhulu sirhuluphel' umnyama,        |
| 11 | Uphetjhulwa mmoya,                        |
| 12 | Urhurhulwa mamanzi;                       |
| 13 | Upheka kuphakululwa, uphakulula kuphekwa. |
| 14 | Akwenzako kwaziwa nguye, umona.           |

7.1 Injani ihliziyo yomuntu onomona ukuya ngembongi?

(1)

7.2 Ngiyiphi inyoni engathekiswa nomuntu onomona?

(1)

7.3 Silala nini isirhulurhulu?

(1)

7.4 Ngamaphuzu AMABILI akhe uhlathulule bona imbongi ithi unjani umuntu onomona.

(4)

7.5 Ngisiphi isithombengqondo esivezwe emudeni olandelako?

Sirhulurhulu sirhuluphel' umnyama

(2)

7.6 Itjho ukuthini imbongi nayithi umuntu onomona:

- A Uba makhaza kumakhaza.
- B Uphetjhulwa mmoya.

(4)

- 7.7 Tlola ubukondlo obuvezwe emudeni olandelako.  
Akwenzako kwaziwa nguye, umona. (1)
- 7.8 Ingabe umuntu onomona uyaphumelela epilweni na? Sekela ipendulwakho ngephuzu ELILODWA. (2)
- 7.9 Sifundo siphi esitholakala kilekondlo? Sekela ipendulwakho ngephuzu ELILODWA. (1½)  
[17½]

**NOFANA****UMBUZO 8**

Fundisisa ikondlo elandelako bese uphendula imibuzo.

**Iindawula – PS Skosana**

- 1 Mathambo weenkomo ezafako
- 2 Zafela abaphilako.
- 3 Ziyavutha, zivutha zingakathungelelwa,
- 4 Amakholwa azibhoda ebusuku,
- 5 Emini azikhombe isibhakabhaka.
- 6 Zinamehlo zinganawo,
- 7 Zihlola ipilo yabaphilako,
- 8 Zikhuluma zithule,
- 9 Ziveza umbulali,
- 10 Zivimba umloyi.
- 11 Ziinganono zikasomswani,
- 12 Azirhatjhe ziveze ifihlo,
- 13 Zembula ziveza beenhliziyo
- 14 Ezigobene sanyoka;
- 15 Awa, ziyarhubhulula.
- 16 Awa, ziyarhubhulula,
- 17 Zenze ugogo umloyi,
- 18 Zenze ukghari umloyi,
- 19 Zenze unosokana umloyi,
- 20 Ngizo zona, ziyarhubhulula
- 21 Mathambo weenkomo ezafako,
- 22 Ngesikhumba senza umkghadi,
- 23 Ngeempondo senza inghwani,
- 24 Ngeengazi senza ububende,
- 25 Ngenyama senza isitjhebo.

26	Ziinsasa zenungu
27	Zihlaba ezimzondako,
28	Zilamula zilwisa,
29	Ziraranisa zirarulule umraro;
30	Ngizo zona, ziyakhulunyelwa.
31	Mathambo akhulunyelwa ngabawaziko,
32	Ingubo zigeja ngekamasizabulale
33	Ziyakhanyisa kusuke umnyama,
34	Abanye ipilo
35	Siyibona ngazo.
36	Siboniboni kabazithembako,
37	Sisitha kabazibinako:
38	UZimu akahlukaniselwana,
39	Zona ziyasehlelwana
40	Khamba nazo nawungayi kude.

- 8.1 Zingathekiswe nani iindawula endimeni yokuthoma? (1)
- 8.2 Ngibaphi abantu ababili iindawula nazirhubhululako zibenza abaloyi? (2)
- 8.3 Tlola imisebenzi EMIBILI eyenziwa ziindawula ukuya ngendima yesibili. (2)
- 8.4 Tlola izinto EZIMBILI ezenziwa ngalokho okutholakala ekomeni ngaphandle kweendawula? (2)
- 8.5 Kubayini imbongi ithi iindawula ziinsasa zenungu. (2)
- 8.6 Hlathulula bona utjho ukuthini umuda olandelako: (2)
- Ziraranisa zirarulule umraro.
- 8.7 Dzubhula imida EMIBILI ekondlweni etjengisa bona amakholwa avezwe ekondlweni anakolelo evangileko. (2)
- 8.8 Funda umutjho olandelako bese ukhetha ipendulo enembako. (1)
- Igama elitjho inyanga ekondlweni:
- A Mbulali.
- B Ngunosokana.
- C Mloyi.
- D Ngusomswani.
- 8.9 Uyini umlayezo wekondlo le? (3½)
- [17½]

**IMITLOMELO YESIGABA C: 35**  
**INANI LOKE: 70**